

四庫全書

集部

欽定四庫全書

王文成全書卷二十二

明 王守仁 撰

外集四 序

羅履素詩集序

壬戌

履素先生詩一帙為篇二百有奇浙大叅羅公某以授  
陽明子某而告之曰是吾祖之作也今詩文之傳皆其  
崇高顯赫者也吾祖隱於草野其所存要無愧於古人  
然世未有知之者而所為詩文又皆淪落止是某將梓

而傳焉懼人之以我為僭也吾子以為奚若某曰無傷也孝子仁孫之於其父祖雖其服玩嗜好之微猶將謹守而弗忍廢況乎詩文其精神心術之所寓有足以發聞於後者哉夫先祖有美而弗傳是弗仁也夫孰得而議之蓋昔者夫子之取於詩也非必其皆有聞於天下彰彰然明著者而後取之滄浪之歌採之孺子萍實之謠得諸兒童夫固若是其寬博也然至於今其傳者不過數語而止則亦豈必其多之貴哉今詩文之傳則誠

富矣使有刪述者而去取之其合於道也能幾履素之作吾誠不足以知之顧亦豈無一言之合於道乎夫有一言之合於道是其於世也亦有一言之訓矣又況其不止於是也而又奚為其不可以傳哉吾觀大叅公之治吾浙寬而不縱仁而有勇溫文蘊藉居然稠衆之中固疑其先必有以開之者乃今觀履素之作而後知其所從來者之遠也世之君子苟未知大叅公之所自吾請觀於履素之作苟未知履素之賢吾請觀於大叅公

之賢無疑矣然則是集也固羅氏之文獻係焉其又可  
以無傳乎哉大叅公起拜曰某固將以為羅氏之書也  
請遂以吾子之言序之大叅公名鑒字某由進士累今  
官有厚德長才向用未艾大叅之父某亦起家進士而  
以文學政事顯羅氏之文獻於此益為有證云

兩浙觀風詩序

壬戌

兩浙觀風詩者浙之士夫為僉憲陳公而作也古者天  
子巡狩而至諸侯之國則命太師陳詩以觀民風其後

巡狩廢而陳詩亡春秋之時列國之君大夫相與盟會  
問遣猶各賦詩以言已志而相祝頌今觀風之作蓋亦  
祝頌意也王者之巡狩不獨陳詩觀風而已其始至方  
岳之下則望秩於山川朝見茲土之諸侯同律歷禮樂  
制度衣服納價以觀民之好惡就見百年者而問得失  
賞有功罰有罪蓋所以布王政而興治功其事亦大矣  
哉漢之直指循行唐宋之觀察廉訪採訪之屬及今之  
按察雖皆謂之觀風而其實代天子以行巡狩之事故

觀風王者事也陳公起家名進士自秋官郎擢僉浙臬  
執操縱予奪生死榮辱之柄而代天子觀風於一方其  
亦榮且重哉吁亦難矣公之始至吾浙適歲之旱民不  
聊生饑者仰而待哺懸者呼而望解病者呻鬱者怨不  
得其平者鳴弱者強者蹶者嚙者梗而孽者狡而竊者  
乘間投隙皆至而環起當是之時而公無以處之吾見  
其危且殆也賴公之才明知神武不震不激撫柔摩剔  
以克有濟期月之間而饑者飽懸者解呻者歌怨者樂

不平者申蹶者起嚙者馴孽者順竊者靖滌蕩剖刷而  
率以無事於是乎修廢舉墜問民之疾苦而休息之勞  
農勸學以興教化然後上會稽登天姥入雁蕩陟金娥  
覽觀江山之形勝慨然太息弔子胥之忠誼禮嚴光之  
高節希遐躅於隆龐挹流風於彷彿固亦大丈夫得志  
行道之一樂哉然公之始其憂民之憂也亦既無所不  
至矣公惟憂民之憂是以民亦樂公之樂而相與懽欣  
鼓舞以頌公德然則今日觀風之作豈獨見吾人之厚



公抑以見公之厚於吾人也雖然公之憂民之憂其惠澤則既無日而可忘矣民之樂公之樂其愛慕亦既與日而俱深矣以公之才罷天子其能久容於外乎則公固有時而去也然則其可樂者能幾而可憂者終誰任之則夫今日觀風之作又不徒以頌公之厚於吾人將遂因公而致望於繼公者亦如公焉則公雖去而所以憂其民者尚亦永有所托而因以不墜也

山東鄉試錄序

甲子

山東古齊魯宋衛之地而吾夫子之鄉也嘗讀夫子家語其門人高弟大抵皆出於齊魯宋衛之國固願一至其地以觀其山川之靈秀奇特將必有如古人者生其間而吾無從得之也今年為弘治甲子天下當復大比山東巡按監察御史陸偁輩以禮與幣來請守仁為考試官故事司考校者惟務得人初不限以職任其後三四十年来始皆一用學職遂致應名取具事歸外簾而糊名易書之意微自頃言者頗以為不便大臣上其議天子

曰然其如故事於是聘禮考校盡如國初之舊而守仁得以部屬來典試事於茲土雖非其人寧不自慶其遭際又况夫子之鄉固其平日所願一至焉者而乃得以盡觀其所謂賢士者之文而考校之豈非平生之大幸歟雖然亦竊有大懼焉夫妻重於考校將以求才也求才而心有不盡是不忠也心之盡矣而真才之弗得是弗明也不忠之責吾知盡吾心爾矣不明之罪吾終且奈何哉蓋昔者夫子之時及門之士嘗三千矣身通六藝

者七十餘人其尤卓然而顯者德行言語則有顏閔予  
賜之徒政事文學則有由求游夏之屬今所取士其始  
拔自提學副使陳某者蓋三千有奇而得千有四百既  
而試之得七十有五人焉嗚呼是三千有奇者其皆夫  
子鄉人之後進而獲游於門牆者乎是七十有五人者  
其皆身通六藝者乎夫今之山東猶古之山東也雖今  
之不逮於古顧亦寧無一二人如昔賢者而今之所取  
苟不與焉豈非司考校者不明之罪歟雖然某於諸士

亦願有言者夫有其人而弗取是誠司考校者不明之罪矣司考校者以是求之以是取之而諸士之中苟無其人焉以應其求以不負其所取是亦諸士者之恥也雖然予豈敢謂果無其人哉夫子嘗曰魯無君子者斯焉取斯顏淵曰舜何人也予何人也有為者亦若是夫為夫子之鄉人苟未能如昔人焉而不恥不若又不知所以自勉是自暴自棄也其名曰不肖夫不肖之與不明其相去何遠乎然則司考校者之與諸士亦均有責

焉耳矣嗟夫司考校者之責自今不能以無懼而不可以有為矣若夫諸士之責其不能者猶可以自勉而又懼其或以自畫也諸士無亦曰吾其勗哉無使司考校者終不免於不明也斯無媿於是舉無媿於夫子之鄉人也矣是舉也某某同事於考校而御史偁實司監臨某某司提調某某司監試某某又相與翊贊防範於外皆與有勞焉不可以不書自餘百執事則已具列於錄矣

氣候圖序

戊辰

天地一元之運為十二萬九千六百年分而為十二會  
會分而為三十運運分而為十二世世分而為三十年  
年分而為十二月月分而為二氣氣分而為三候候分  
為五日日分為十二時積四千三百二十時三百六十  
日而為七十二候會者元之候也世者運之候也月者  
歲之候也氣者月之候也天地之運日月之明寒暑之  
代謝氣化人物之生息終始盡於此矣月證於月者也

氣證於氣者也候證於候者也若孟春之月其氣為立春為雨水其候為東風解凍為蟄蟲始振為魚負冰獺祭魚之類月令諸書可考也氣候之運行雖出於天時而實有關於人事是以古之君臣必謹修其政令以奉若夫天道致察乎氣運以警惕夫人為故至治之世天無疾風盲雨之愆而地無昆虫草木之孽孔子之作春秋也大雨震電大雨雪則書大水則書無冰則書無麥苗則書多麋則書蟄蜚雨螽蟃生則書六鷁退飛則書



隕霜不殺草李梅實則書春無冰則書鸛鵒來巢則書  
凡以見氣候之愆變失常而世道之興衰治亂人事之  
汙隆得失皆於是乎有證焉所以示世之君臣者恐懼  
修省之道也大總兵懷柔伯施公命繪工為七十二候  
圖遣使以幣走龍場屬守仁叙一言於其間守仁謂使  
者曰此公臨政之本也善端之發也戒心之萌也使  
者曰何以知之守仁曰人之情必有所不敢忽也而後著  
於其念必有所不敢忘也而後存於其心著於其念存

於其心而後見之於顏色言論志之於弓矢几杖盤盂  
劍席繪之於圖畫而日省之於其心是故思馳騁者愛  
觀夫射獵遊田之物甘逸樂者喜親夫博局燕飲之具  
公之見於圖繪者不於彼而於此吾是以知其為善端  
之發也吾是以知其為戒心之萌也其殆警惕夫人為  
而謹修其政令也歟其殆致察乎氣運而奉若夫天道  
也歟夫警惕者萬善之本而衆美之基也公克念於是  
其可以為賢乎由是因人事以達於天道因一月之候

以觀夫世運會元以探萬物之幽蹟而窮天地之始終  
皆於是乎始吾是以喜聞而樂道之為之叙而不辭也

送毛憲副致仕歸桐江書院序

戊辰

正德己巳夏四月貴州按察司副使毛公承上之命得  
致其仕而歸先是公嘗卜桐江書院於子陵釣臺之側  
者幾年矣至是將歸老焉謂其志之始獲遂也甚喜而  
同僚之良惜公之去乃相與咨嗟不忍集而餞之南門  
之外酒既行有起而言於公者曰君子之道出與處而

已其出也有所為其處也有所樂公始以名進士從政南部理繁治劇頎然已有公輔之望及為方面於雲貴之間者十餘年內釐其軍民外撫諸戎蠻夷政務舉而德威著雖或以是召嫉取謗而名稱亦用是益顯建立暴於天下斯不謂之有所為乎今茲之歸脫屣聲利垂竿讀書樂泉石之清幽就烟霞而屏迹寵辱無所與而世累無所加斯不謂之有所樂乎公於出處之際其亦無憾焉耳已公起拜謝復有言者曰雖然公之出而仕

也太夫人老矣先大夫忠襄公又遺未盡之志欲仕則違其母欲養則違其父不得已權二者之輕重出而自奮於功業人徒見公之憂勞為國而忘其家不知凡以成忠襄之志而未嘗一日不在於太夫人之養也今而歸告成於忠襄之廟拜太夫人於膝下旦夕承懽伸色養之孝公之願遂矣而其勞國勤民拳拳不舍之念又何能釋然而忘之則公雖欲一日遂歸休之樂蓋亦有所未能也公復起拜謝又有言者曰雖然君子之道用

之則行舍之則藏用之而不行者往而不返者也舍之而不藏者溺而不止者也公之用也既有以行之其舍之也有弗能藏者乎吾未見夫有其用而無其體者也公又起拜遂行陽明山人聞其言而論之曰始之言道其事也而未及於其心次之言者得公之心矣而未盡於道終之言者盡於道矣不可以有加矣斯公之所允蹈者乎諸大夫皆曰然子盍書之以贈從者

恩壽雙慶詩後序

戊辰

正德丙寅丹徒沙隱王公壽七十配孺人嚴六十有九  
其年天子以厥子侍御君貴封公監察御史配為孺人  
在朝之彥咸為歌詩侈上之德以祝公壽美侍御君之  
賢又明年侍御君奉命巡按貴陽以王事之靡監將厥  
父母之弗遑也載是冊以俱每陟岵望飛雲徘徊瞻  
戀喟然而興嘆黯然而長思輒取是冊而披之而微諷  
之而長歌詠嘆之以舒其懷見其志雖身在萬里固若  
稱觴膝下聞詩禮而趨於庭也大夫士之有事於貴陽

者自都憲王公而下復相與歌而和之聯為巨帙屬守  
仁叙於其後夫孝子之於親固有不必捧觴戲彩以為  
壽不必柔滑旨甘以為養不必候起居奔走扶攜以為  
勞者非子之心謂不必如是也子之心願如是而親以  
為不必如是必如彼而後吾之心始樂也子必為是不  
為彼以拂其情而曰吾以為孝其得為養志乎孝莫大  
乎養志親之願於其子者曰弘乃德遠乃猶嘻嘻旦夕  
孰與名垂簡冊以顯我於無盡飲食口體孰與澤被生



民以張我之能施服勞奔走孰與比迹夔臯以明我之  
能教非必親之願於其子者咸若是也親以是願其子  
而子弗能焉弗可得而願也子能之而親弗以願其子  
焉弗可得而能也以是願其子者賢父母也以是承於  
其父母者賢子也二者恒百不一遇焉其庸可冀乎侍  
御君之在朝則忠愛達於上其巡按於茲也則德威敷  
於下凡其宣布恩惠摩赤子起其疾而乳哺之者孰非  
公與孺人之慈凡其懾大奸使不得肆祛大弊使不復

作爬梳調服撫諸夷而納之夏以免天子一方之顧慮者孰非侍御君之孝而凡若此者亦孰非侍御君之所以壽於公與孺人之壽哉公孺人之賢斯太史之序詳矣其所以修其身教其家誠可謂有是父有是子是詩之作不為虛與諛故為序之云爾

重刻文章軌範序

戊辰

宋謝枋得氏取古文之有資於場屋者自漢迄宋凡六十有九篇標揭其篇章句字之法名之曰文章軌範蓋

古文之興不止於是是獨為舉業者設耳世之學者傳習已久而貴陽之士獨未之多見侍御王君汝楫於按厯之暇手錄其所記憶求善本而校是之謀諸方伯郭公輩相與捐俸廩之資鋟之梓將以嘉惠貴陽之士曰枋得為宋忠臣固以舉業進者是吾微有訓焉屬守仁叙一言於簡首夫自百家之言興而後有六經自舉業之習起而後有所謂古文古文之去六經遠矣由古文而舉業又加遠焉士君子有志聖賢之學而專求之於

舉業何啻千里然中世以是取士士雖有聖賢之學堯舜其君之志不以是進終不大行於天下蓋士之始相見也必以贅故舉業者士君子求見於君之羔雉耳羔雉之弗飾是謂無禮無禮無所庸於交際矣故夫求工於舉業而不事於古作弗可工也弗工於舉業而求於倖進是偽飾羔雉以罔其君也雖然羔雉飾矣而無恭敬之實焉其如羔雉何哉是故飾羔雉者非以求媚於主致吾誠焉耳工舉業者非以要利於君致吾誠焉耳

世徒見夫由科第而進者類多徇私媒利無事君之實而遂歸咎於舉業不知方其業舉之時惟欲釣聲利弋身家之腴以苟一旦之得而初未嘗有其誠也鄒孟氏曰恭敬者幣之未將者也伊川曰自洒掃應對可以至聖人夫知恭敬之實在於飾羔雉之前則知堯舜其君之心不在於習舉業之後矣知洒掃應對之可以進於聖人則知舉業之可以達於伊傅周召矣吾懼貴陽之士謂二公之為是舉徒以資其希寵祿之筌蹄也則二

公之志荒矣於是乎言

五經臆說序

戊辰

得魚而忘筌醪盡而糟粕棄之魚醪之未得而曰是筌與糟粕也魚與醪終不可得矣五經聖人之學具焉然自其已聞者而言之其於道也亦筌與糟粕耳竊嘗怪夫世之儒者求魚於筌而謂糟粕之為醪也夫謂糟粕之為醪猶近也糟粕之中而醪存求魚於筌則筌與魚遠矣龍場居南夷萬山中書卷不可攜日坐石穴默記

舊所讀書而錄之意有所得輒為之訓釋期有七月而五經之旨畧遍名之曰臆說蓋不必盡合於先賢聊寫其胸臆之見而因以娛情養性焉耳則吾之為是固又忘魚而釣寄興於麴蘖而非誠旨於味者矣嗚呼觀吾之說而不得其心以為是亦筌與糟粕也從而求魚與醪焉則失之矣夫說凡四十六卷經各十而禮之說尚多缺僅六卷云

潘氏四封錄序

辛未

歛潘氏之仕於朝者戶部主事君選大理寺副君珎戶部員外君旦南大理評事君鑑凡四人正德五年冬珎旦以上三載最選鑑以兩宮徽號旬月之間皆得推恩封其親如其官焉於是叙八制為錄侈上之賜以光其族裔而來謂某曰德下寵浮若之何其可請一言以永我潘氏某曰一族而四顯來者相望也其盛哉夫一月之間而均被榮渥則又何難也蓋吾聞之大山之木千仞而四幹垂而四峰之巔飛鳥之鳴聲不相及也春氣



至而四榦之杪花葉若一則其所出之根同有不期致  
焉潘氏之在發聞望自宋元而來其培本則厚四子者  
固亦潘氏之四榦矣是惟否塞閉晦苟際明期而諧景  
會其軒竦條達孰禦則夫寵命之沾暨不約而同也其  
又足異哉雖然木之生風霆之鼓舞炎暑之酷烈陰寒  
氷雪之嚴沍剝落俾堅其質而完其氣非獨雨露之沾  
濡生成之也夫恩寵爵祿雨露也號令宣播風霆也法  
度政事之苛密煩困炎暑也時之險阨患難顛沛陰寒

冰雪之嚴沍剥落也何莫而非生成四子蓋亦畧嘗歷之其材中樞柱而任梁棟矣吾願潘氏之益培其根也四子拜而起曰吾其益培之以忠孝乎溉之以誠敬乎植之以義而防之以禮乎某曰然則潘氏之軒竦條達其蓋無窮爾已矣某不為應酬詩文餘四年矣寺副君之為暨陽也予嘗許之文未及為而有南北之別今茲復見於京師而以是責償焉故不得而辭也

送章達德歸東雁序

辛未

章達德將歸東雁石龍山人為之請於是甘泉子托以  
考槃陽明子為之賦衡門客有在坐者啞然曰異哉二  
夫子之言吾不能知之夫閔爾形無搖爾精也其可矣  
今茲將惟職業之弗遑而顧雁蕩之懷乎彼章子者雁  
蕩之產矣則又可以居而弗居依依於京師者數年而  
未返是二者交相慕乎其外也夫苟游心恬淡而栖神  
於流俗塵囂之外環堵之間其無屏霞天柱乎雁蕩又  
奚必造而後至不然托踪泉石而利祿壯其中雖廬常

雲之頂其得而居諸於是陽明子仰而喟俯而默卒無以應之也志其言以遺章子曰客見吾機權焉行矣子毋忘客之言亦無以客之言而忘甘泉子之托

壽湯雲谷序

甲戌

弘治壬戌春某西尋句曲與丹陽湯雲谷偕當是時雲谷方為行人留意神仙之學為予談呼吸屈伸之術凝神化氣之道蓋無所不至及與之登三茅之巔下探葉陽休玉宸感陶隱君之遺迹慨嘆穢濁飄然有脫屣人

間之志予時皆未之許也雲谷意不然之曰子豈有見於吾乎予曰然子之眉間慘然猶有怛世之色是道也遲之十年庶幾矣雲谷曰子見吾之貌而吾信吾之心既別雲谷尋入為給事中又遷為右給事殫心職務驅逐瘁勞竟以直道抵權奸斥外而予亦以言事得罪奔走謫鄉不相見者十餘年至是正德癸酉某月予自吏部徙官南太僕再過丹陽而雲谷已家居三年矣訪之迎謂予曰尚憶眉間之說乎吾信吾之心而不若子之

見吾貌何也今果十年而始出於泥塗是則信矣然謂  
吾之庶幾也則貌益衰年益逝去道益遠獨是若未之  
盡然耳予曰乃今則幾矣今吾又聞子之言見子之貌  
矣又見子之廬矣又見子之鄉人矣雲谷曰異哉言貌  
既遠矣廬與鄉人亦可以見我乎曰古之有道之士外  
槁而中澤處隘而心廣累糶而無所撓其精機忘而無  
所忤於俗是故其色愉愉其居于其所遭若清風之  
披物而莫知其所從往也今子之步徐髮改而貌若益

儼然而其精藏矣言下意愜而氣若益衰然而其神守  
矣室廬無所增益於舊而志意擴然其累釋矣鄉之人  
相忘於賢愚貴賤且以為慈母且以為嬰兒其機忘矣  
夫精藏則太和流神守則天光發累釋則怡愉而靜機  
忘則心純而一四者道之證也夫道無在而神無方安  
常處順其至矣而又何人間之脫屣乎雲谷曰有是哉  
吾信吾之心乃不若子之見吾廬與吾鄉人也於是雲  
谷年七十矣是月值其懸弧鄉人方謀所以祝壽者聞

予至皆來請言予曰嘻子之鄉先生既幾於道而尚以  
壽為賀乎夫壽不足以為子之鄉先生賀子之鄉而有  
有道之士若子之鄉先生者使爾鄉人之子弟皆有所  
矜式視倣出而事君則師其道以用世入而家居則師  
其道以善身若射之有的各中乃所向則是先生之壽  
乃於爾鄉之人復有足賀也已明年二月予再官鴻臚  
而鄉之人復以書來請遂追書之

文山別集序

甲戌



文山別集者宋丞相文山先生自述其勤王之所經歷  
後人因而採集之以成者也其間所值險阻艱難顛沛  
萬狀非先生之述固無從而盡知者先生忠節蓋宇宙  
皆於是而有據後之人因詞考迹感先生之大義油然而  
興起其忠君愛國之心固有泫然泣下裂眥扼腕思喪  
元首之無地者是集之有益於臣道豈小小哉古之君  
子之忠於其君求盡吾心焉以自慊而已亦豈屑屑言  
之以蘄知於世然而仁人之心忠於其君亦欲夫人之

忠於其君也忠於其君則盡心焉已欲夫人忠於其君而思以吾之忠於其君者啟其良心固有人弗及知之者非自言之何由以及人乎斯先生之所為自述將以教世之忠也當其時仗節死義之士無不備載亦因是以有傳是又與人為善者也是集也在先生之自盡若嫵於蘄世之知以先生之教人則吾惟恐其知之不盡也在先生之自盡若可以無傳以先生之與人為善則吾惟恐其傳之不遠也先生之裔孫今太僕少卿公宗

巖復刻是集而屬某為之序某之為廬陵也公之族弟  
某嘗以序請茲故不可得而辭嗚呼當顛沛之心而不  
忘乎與人為善者節之裕也致自盡之心而欲人同歸  
於善者忠之推也不以漸知為嫌而行其教人之誠者  
仁之篤也象賢崇德以章其先世之美之謂孝明訓述  
事以廣其及人之教之謂義吾於是集之序無愧辭耳  
矣

金壇縣志序

乙亥

麻城劉君天和之尹金壇也三月而政成考邑之故而  
創志焉曰於乎艱哉吾欲觀風氣之所宜民俗之所向  
而無所證也以諏於鄉老有遺聽焉吾欲觀往昔之得  
失民俗之急緩弛張先後之無所稽也以詢於閭野有  
遁情焉吾欲觀山川之條理疆域之所際道路井邑之  
往來聚散制其經適其變而無所裁也則以之闢荒穢  
入林麓有遺厯焉亦惟文獻之未足也而爾已矣嗚呼  
古君子之忠也舊政以告於新尹吾何以盡吾心哉夫

政有時而或息焉告有時而或窮焉書之冊而世守之  
斯其為告也不亦遠乎志成使來請序吾觀之秩然其  
有倫也錯然其有章也天也物之祖也地也物之妣也  
故先之以天文而次之以地理地必有所產故次之以  
食貨物產而事興故次之以官政政行而齊之以禮則  
教立故次之以學校學以興賢故次之以選舉賢興而  
後才可論也故次之以人物人物必有所居故次之以  
宮室居必有所事事窮則變變則通故次之以雜志終

馬鳴呼此豈獨以志其邑之故君子可以觀政矣夫經  
之天文所以立其本也紀之地理所以順其利也叅之  
食貨所以遂其養也綜之官政所以均其施也節之典  
禮所以成其俗也達之學校所以新其德也作之選舉  
所以用其才也考之人物所以辨其等也修之宮室所  
以安其居也通之雜志所以盡其變也故本立而天道  
可睹矣利順而地道可因矣養遂而民生可厚矣施均  
而民政可平矣俗成而民志可立矣德新而民性可復

矣才用等辨而民治可久矣居安盡變而民義不匱矣  
修此十者以治達之邦國天下可也而況於邑乎故曰  
君子可以觀政矣

送南元善入覲序

乙酉

渭南南侯之守越也越之敝數十年矣巨奸元慙窟據  
根盤良牧相尋未之能去政積事隳俗因隳靡至是乃  
斬然翦剔而一新之克惡貪殘禁不得行而狡偽淫侈  
游惰苟安之徒亦皆拂戾失常有所不便相與斐斐緝

緝搆讒騰誹城狐社鼠之奸又從而黨比翕張之謗遂  
大行士夫之為元善危者沮之曰謗甚矣盍已諸元善  
如不聞也而持之彌堅行之彌決且曰民亦非無是非  
之心而蔽昧若是固學之不講而教之不明也吾寧無  
責而獨以咎歸於民則日至學宮進諸生而作之以聖  
賢之志啟之以身心之學士亦蔽於習染闕然疑惟以  
駭曰是迂闊之談將廢吾事則又相與斐斐緝緝訾毀  
而詆議之士夫之為元善危者沮之曰民之謗若火之



始炎士又從而膏之孰能以無燼乎盍遂已諸元善如  
不聞也而持之彌堅行之彌決則又緝稽山書院萃其  
秀穎而日與之諄諄焉疊疊焉越月踰時誠感而意孚  
三學洎各邑之士亦漸以動日有所覺而月有所悟矣  
於是爭相奮曰吾乃今知聖賢之必可為矣非侯之至  
吾其已夫侯真吾師也於是民之謗者亦漸消沮其始  
猶曰侯之於我利害半我之於侯恩愛半至是惠洽澤  
流而政益便相與悔曰吾始不知侯之愛我也而反以

為殃我也吾始不知侯之拯我也而反以為勞我也我其無人之心乎侯真吾之嚴父也慈母也於是侯且入覲百姓皇皇請留不得相與謀之多士曰吾去慈母吾將安哺乎嚴父吾去吾將安恃乎士曰吁嗟維父與母則生爾身維侯我師實生我心吾寧可以一日而無吾師之臨乎則相與假重於陽明子而乞留焉陽明子曰三年之覲大典也侯焉可留乎雖然此在爾士爾民之心夫承志而無違子之善養也離師友而不背弟子之

善學也不然雖居膝下而侍几杖猶為不善養而操戈入室者也奚必以留侯為哉衆皆默然良久曰公之言是也相顧逡巡而退明日復師生相率而來請曰無以輸吾之情願以公言致之於侯庶侯之過其來旋而有以速諸生之化慰吾民之延頸也

送聞人邦允序

聞人言邦允者陽明子之表弟也將之官閩之蒼峽而請言陽明子謂之曰重矣勿以進非科第而自輕榮矣

勿以官卑而自慢夫進非科第則人之待之也易以輕  
從而自輕者有矣官卑則人之待之也易以慢從而自  
慢者有矣夫科第以致身而恃以為暴是厲階也高位  
以行道而遽以媒利是盜資也於吾何有哉吾所謂重  
吾有良貴焉耳非矜與敖之謂也吾所謂榮吾職易舉  
焉耳非顯與耀之謂也夫以良貴為重舉職為榮則夫  
人之輕與慢之也亦於吾何有哉行矣吾何言

送別省吾林都憲序

戊子

嘉靖丁亥冬守仁奉命視師思田省吾林君以廣西右  
轄實與有司既思田來格謀所以緝綏之道咸以為非  
得寬厚仁恕德威素為諸夷所信服者父臨而母鞠之  
殆未可以強力詭計劫制於一時而能久於無變者也  
則莫有踰於省吾者遂以省吾之名上請乞加憲職委  
之重權以留撫於茲土蓋一年二年而化洽心革朝廷  
永可以無一方顧也乎則又以為聖天子方側席勵精  
求卓越之才須更化善治則如省吾之成德夙望大臣

且文章論薦或者請未及上而先已有隆委峻擢恐未肯為區區兩府之遺黎淹歲月而借之以重也疏去未踰月而巡撫鄖陽之命果下矣當是時八寨之猺積禍千里且數十年方議進兵討罪省吾將率思田報效之民以先之報聞衆咸為省吾賀且謂得免兵革驅馳之勞也省吾曰不然當事而中輟之仁者忍之乎遇難而苟避之義者為之乎吾既身任其責幸有改命而亟去之以違吾心吾能如是哉遂弗停驅而往冒暑雨犯瘴

毒乘危破險竟成八寨之伐而出嗟乎今世士夫計逐功名甚於市井刀錐之較稍有患害可相連及輒設機阱立黨援以巧脫幸免一不遂其私瞋目攘臂以相抵捍鉤摘公然為之曾不以為恥而人亦莫有非之者蓋士風之衰薄至於此而亦極矣而省吾所存獨與時俗相反若是古所謂托孤寄命臨大節而不可奪者省吾有焉正德初某以武選郎詆逆瑾逮錦衣獄而省吾亦以大理評觸時諱在繫相與講易於桎梏之間者彌月

蓋晝夜不怠忘其身之為拘囚也至是別已餘二十年而始復會於此省吾貌益充氣益粹議論益平實而其孜孜講學之心則固如昔加懇切焉公事之餘相與訂舊聞而考新得予自近年偶有見於良知之學遂具以告於省吾而省吾聞之沛然若決江河可謂平生之一快無負於二十年之別也矣今夫天下之不治由於士風之衰薄而士風之衰薄由於學術之不明學術之不明由於無豪傑之士者為之倡焉耳省吾忠信仁厚之



質得之於天者既與人殊而其好學之心又能老而不  
倦若此其德之日以新而業之日以廣也何疑乎自此  
而明學術變士風以成天下治將不自省吾為之倡也  
乎於省吾之別庸書此以致切劘之意若夫期望於聲  
位之間而繫情於去留之際是奚足為省吾道之哉

王文成全集卷二十二

欽定四庫全書

王文成金書卷二十三

明 王守仁 撰

外集五

記

興國守胡孟登生像記

壬戌

弘治十年胡公孟登以地官副郎謫貳興國越三年擢知州事公既久於其治乃奸鋤利植而民以大和又明年壬戌擢浙江按察司僉事以去民既留公不可則相率祀公之像以報公德而學宮之左有疊山祠以祀宋

臣謝枋得者舊矣其士曰合祀公像於是嗚呼吾州違  
前元之亂以入於皇朝雖文風稍振而陋習未除士之  
登名科甲以顯於四方者相望如晨天之星數不能以  
一二蓋至於今遂茫然絕響者凡幾科矣自公之來斬  
山斥地以恢學宮洗垢磨鈍以新士習然後人知敦禮  
興樂而文采蔚然於湖湘之間薦於鄉者一歲而三人  
蓋夫子之道大明於興國實自公始公之德惠固無庸  
言而化民成俗於是為大祀公於此其宜哉民曰不可

其為公別立一廟公之未來也吾民外苦於盜賊內殘  
於苛政濱湖之民死於魚課者數千餘家自公之至而  
盜不敢履興國之界民違猛虎魚鼈之患而始釋戈而  
安寢歌呼相慰以嬉於里巷公之惠澤吾獨不能出諸  
口耳嗚呼公有大造於吾民乃不能別立一廟而使並  
食於謝公於吾心有未足也士曰不然公與謝公皆以  
遷謫而至吾州謝公以文章節義為宋忠臣而公之氣  
槩風聲寔相輝映祀公於此所以見公之庇吾民者不

獨以其政事而吾民之所以懷公於不忘者又有在於  
長養恩恤之外也其於尊嚴崇重不滋為大乎於是其  
民相顧喜曰果如是我亦無所憾矣然其誰紀諸石以  
傳之士曰公之經歷四方也久矣四方之人其聞公之  
賢亦既有年矣然而屢遭讒嫉而未暢厥猷意亦知公  
之深者難也公嘗令於餘姚以吾人之知公則其人宜  
於公為悉乃走幣數千里而來請於某且告之故某曰  
是姚人之願不獨興國也公之去吾姚已二十餘年民

之思公如其始去每有自公而來者必相與環聚問公之起居飲食及其履歷之險夷丰采壯觀貌鬚髮之蒼白否退則相傳告以為欣戚以吾姚之思公知興國之為是舉亦其情之有不得已也然公之始去吾姚既嘗有去思之碑以紀公德今不可以重複其說而興國之績吾雖聞之甚詳然於其民為遠雖極意揄揚之恐亦未足以當其心也姑述其請記之辭而詩以系之公諱瀛河南之羅山人有文武長才而方嚮於用詩曰於維胡

公允毅孔直維直不撓以來興國惟此興國實荒有年  
自公之來闢為良田寇乘于垣死課于澤公曰吁嗟茲  
惟予謫勤爾桑禾謹爾室家歲豐時和民謠以歌乃築  
泮宮教以禮讓弦誦詩書溢于里巷庶民諄諄庶士彬  
彬公亦欣欣曰惟家人惟公我父惟公我母自公之去  
奪我恃怙維公之政不專於寬雨暘維若時其燠寒維  
公文武亦周于藝射御工力展也不器我拜公像從我  
父兄率我子弟集于泮宮父兄相謂毋爾敢望天子用

公訓于四方

新建預備倉記

癸亥

倉廩以儲國用而民之不給亦於是乎取故三代之時  
上之人不必其盡輸之官府下之人不必其盡藏於私  
室後世若常平義倉蓋猶有所以為民者而先王之意  
亦既衰矣及其大弊而倉廩之蓄遂邈然與民無復相  
關其遇凶荒水旱民饑孱相枕藉苟上無賑貸之令雖  
良有司亦坐守鍵閉不敢發升合以拯其下民之視其



官廩如仇人之壘無以事其刃為也嗚呼倉廩之設豈固如是也哉紹興之倉目如坻大有之屬凡三四區中所積亦不下數十萬然而民之饑餒稍不稔即無免焉歲癸亥春融風日作星火宵隕太守佟公曰是旱徵也不可以無備既命民間積穀謹藏則復鳩工度地得舊太積庫地於郡治之東而建以為預備倉於是四月不雨至於八月農工大壞比室磬懸民陸走數百里轉嘉湖之粟以自療市火間作貿遷無所居公帥僚吏遍禱

於山川社稷迺八月己酉大雨洽旬禾槁復穎民始有  
十一之望漸用蘓息公曰嗚呼予所建今茲之旱雖誠  
無補於後患其將有裨迺益遂厥營九月丁卯工畢凡  
為廩三面廿有六楹約受穀十萬幾千斛前為廳事以  
司出納而以其無事時則凡賓客部使之往來而無所  
寓者又皆可以館之於是極南阻民居限以高垣東折  
為門出之大衢並門為屋廿有八楹自南亘北以居商  
旅之貿遷者而月取其值以實廩粟又於其間區畫而

綜理之蓋積三歲而可以有一年之備矣二守錢君謂其僚曰公之是舉其惠於民豈有窮乎夫後之民食公之德而弗知其所自是吾儕無以贊公於今日而又以泯其績於後也於是相率來屬某以記某曰唯唯夫閔災而恤患庇民之仁也未患而預防先事之知也已患而不怠臨事之勇也創今以圖後敷德之誠也行一事而四善備焉是而可以無紀也乎某雖不文也願與執筆而從事

平山書院記

癸亥

平山在鄞陵之北三里今杭郡守楊君溫甫蚤歲嘗讀書其下鄞人之舉進士者自溫甫之父僉憲公始而溫甫承之溫甫既貴建以為書院曰使吾鄉之秀與吾楊氏之子弟誦讀其間翹翹焉相繼而興以無亡吾先君之澤於是其鄉多文士而溫甫之子晉復學成有器識將紹溫甫而起蓋書院為有力焉溫甫始為秋官郎子時實為僚佐相懷甚得也溫甫時時為予言平山之勝

聳秀竒特比於峩峩望之巖厲壁削若無所容而其上  
乃寬衍平博有老氏宮焉殿閣魁傑偉麗聞於天下俯  
覽大江煙雲杳靄暇輒從朋儕往遊其間鳴湍絕壑拂  
雲千仞之木陰翳虧蔽書院當其麓其高可以眺其邃  
可以隱其芳可以采其清可以濯其幽可以棲吾因而  
望之以含遠之樓蟄之以寒香之塢揭之以秋芳之亭  
澄之以洗月之池息之以棲雲之窩四時交變風雪晦  
暝之朝花月澄芬之夕光景超忽千態萬狀而吾誦讀

於其間蓋冥然與世相忘若將終身焉而不知其他也  
今吾汨沒於簿書案牘思平山之勝而庶幾夢寐焉何  
可得耶既而某以病告歸陽明溫甫尋亦出守杭郡錢  
塘波濤之洶怪西湖山水之秀麗天下之言名勝者無  
過焉噫溫甫之居是地當無憾於平山耳矣今年與溫  
甫相見於杭而疊疊於平山者猶昔也吁亦異矣豈其  
沈溺於茲山果有不能忘情也哉溫甫好學不倦其為  
文章追古人而並之方其讀書於平山也優游自得固

將發為事業以顯於世及其施諸政事沛然有餘矣則又益思致力於問學而其間又自有不暇者則其眷戀於茲山也有以哉溫甫既已成已則不能忘於成物而建為書院以倡其鄉人處行義之時則不能忘其隱居之地而拳拳於求其志者無窮已也古人有言成已仁也成物知也溫甫其仁且知者歟又曰隱居以求其志行義以達其道吾聞其語矣未見其人也溫甫殆其人也非歟溫甫屬予記予未嘗一至平山而平山巖巖之

氣象軒然壁立而不可犯者固可想而知其不異於溫甫之為人也以溫甫之語予者記之

何陋軒記

戊辰

昔孔子欲居九夷人以為陋孔子曰君子居之何陋之有守仁以罪謫龍場龍場古夷蔡之外於今為要綏而習類尚因其故人皆以予自上國往將陋其地弗能居也而予處之旬月安而樂之求其所謂甚陋者而莫得獨其結題鳥言山棲羝服無軒裳宮室之觀文儀揖讓



之緝然此猶淳龐質素之遺焉蓋古之時法制未備則有然矣不得以為陋也夫愛憎面背亂白黥丹浚奸窮黠外良而中螫諸夏蓋不免焉若是而彬郁其容宋甫魯掖折旋矩矱將無為陋乎夷之人迺不能此其好言惡詈直情率遂則有矣世徒以其言辭物采之眇而陋之吾不謂然也始予至無室以止居於叢棘之間則鬱也遷於東峯就石穴而居之又陰以濕龍場之民老稚日來視予喜不予陋益予比予嘗圃于叢棘之右民謂

予之樂之也相與伐木閣之材就其地為軒以居予予  
因而翳之以檜竹蒔之以卉藥列堂階辯室與琴編圖  
史講誦遊適之道畧具學士之來遊者亦稍稍而集於  
是人之及吾軒者若觀於通都焉而予亦忘予之居夷  
也因名之曰何陋以信孔子之言嗟夫諸夏之盛其典  
章禮樂厯聖修而傳之夷不能有也則謂之陋固宜於  
後蔑道德而專法令搜抉鈎繫之術窮而狡匿譎詐無  
所不至渾樸盡矣夷之民方若未琢之璞未繩之木雖

粗礪頑梗而推斧尚有施也安可以陋之斯孔子所為  
欲居也歟雖然典章文物則亦胡可以無講今夷之俗  
崇巫而事鬼瀆禮而任情不中不節卒未免於陋之名  
則亦不講於是耳然此無損於其質也誠有君子而居  
焉其化之也蓋易而予非其人也記之以俟來者

君子亭記

戊辰

陽明子既為何陋軒復因軒之前榮駕楹為亭環植以  
竹而名之曰君子曰竹有君子之道四焉中虛而靜通

而有間有君子之德外節而直貫四時而柯葉無所改  
有君子之操應蟄而出遇伏而隱雨雪晦明無所不宜  
有君子之時清風時至玉聲珊珊然中采齊而協肆夏揖  
遜俯仰若洙泗羣賢之交集風止籟靜挺然特立不撓  
不屈若虞廷羣后端冕正笏而列於堂陛之側有君子  
之容竹有是四者而以君子名不愧於其名吾亭有竹  
焉而因以竹名名不愧於吾亭門人曰夫子蓋自道也  
吾見夫子之居是亭也持敬以直內靜虛而若愚非君

子之德乎遇屯而不懼處困而能亨非君子之操乎昔也行於朝今也行於夷順應物而能當雖守方而弗拘非君子之時乎其交翼翼其處雍雍意適而匪懈氣和而能恭非君子之容乎夫子蓋謙於自名也而假之竹雖然亦有所不容隱也夫子之名其軒曰何陋則固以自居矣陽明子曰嘻小子之言過矣而又弗及夫是四者何有於我哉抑學而未能則可云爾耳昔者夫子不云乎汝為君子儒無為小人儒吾之名亨也則以竹也

人而嫌以君子自名也將為小人之歸矣而可乎小子識之

遠俗亭記

戊辰

憲副毛公應奎名其退食之所曰遠俗陽明子為之記曰俗習與古道為消長塵囂溷濁之既遠則必高明清曠之是宅矣此遠俗之所由名也然公以提學為職又兼理夫獄訟軍賦則彼舉業辭章俗儒之學也簿書期會俗吏之務也二者公皆不免焉舍所事而

曰吾以遠俗俗未遠而曠官之責近矣君子之行也不遠於微近纖曲而盛德存焉廣業著焉是故誦其詩讀其書求古聖賢之心以蓄其德而達諸用則不遠於舉業辭章而可以得古人之學是遠俗也已公以處之明以決之寬以居之恕以行之則不遠於簿書期會而可以得古人之政是遠俗也已苟其心之凡鄙猥瑣而徒閒散踈放之是托以為遠俗其如遠俗何哉昔人有言事之無害於義者從俗可也君子

豈輕於絕俗哉然必曰無害於義則其從之也為不苟  
矣是故苟同於俗以為通者固非君子之行必遠於俗  
以求異者尤非君子之心

象祠記

戊辰

靈博之山有象祠焉其下諸苗夷之居者咸神而事之  
宣慰安君因諸苗夷之請新其祠屋而請記於予予曰  
毀之乎其新之也曰新之新之也何居乎曰斯祠之肇  
也蓋莫知其原然吾諸蠻夷之居是者自吾父吾祖溯



曾高而上皆尊奉而裡祀焉舉之而不敢廢也予曰胡然乎有庠之祠唐之人蓋嘗毀之象之道以為子則不孝以為弟則傲斥於唐而猶存於今毀於有庠而猶盛於茲土也胡然乎我知之矣君子之愛若人也推及於其屋之烏而況於聖人之弟乎哉然則祀者為舜非為象也意象之死其在干羽既格之後乎不然古之薦桀者豈少哉而象之祠獨延於世吾於是益有以見舜德之至入人之深而流澤之遠且久也象之不仁蓋其始

焉爾又烏知其終之不見化於舜也書不云乎克諧以孝烝烝乂不格姦瞽瞍亦允若則已化而為慈父象猶不弟不可以為諧進治於善則不至於惡不抵於姦則必入於善信乎象蓋已化於舜矣孟子曰天子使吏治其國象不得以有為也斯蓋舜愛象之深而慮之詳所以扶持輔導之者之周也不然周公之聖而管蔡不免焉斯可以見象之既化於舜故能任賢使能而安於其位澤加於其民既死而人懷之也諸侯之卿命於天子

蓋周官之制其殆倣於舜之封象歟吾於是益有以信  
人性之善天下無不可化之人也然則唐人之毀之也  
據象之始也今之諸夷之奉之也承象之終也斯義也  
吾將以表於世使知人之不善雖若象焉猶可以改而  
君子之修德及其至也雖若象之不仁而猶可以化之  
也

卧馬塚記

戊辰

卧馬塚在宣府城西北十餘里有山隆然來自蒼茫若

涌若瀉若奔若伏布為層裊擁為覆金漫行陂迤環抱  
涵迥中凝外完內缺門若合流泓洄高岸屏塞限以重  
河敷為廣野桑乾燕尾遠泛近挹今都憲懷來王公實  
奠厥考大卿於是方公之下兆也禱於大卿然後出從  
事屢如未迪末迺來茲顧瞻徘徊心契神得將歸而加  
諸卜爰視公馬眷然踞卧嚏嗅盤旋繾綣嘶秣若故以  
啟公之意者公曰嗚呼其弗歸卜先公則既命於此矣  
就其地寔馬厥土五色厥石四周融潤煦淑面勢環拱

既葬弗震弗崩安靖安謚植樹蒼蔚庶草芬茂禽鳥哺  
集風氣凝毓產祥萃休祉福駢降鄉人謂公孝感所致  
相與名其封曰卧馬以志厥祥從而歌之士大夫之聞  
者又從而和之正德戊辰守仁謫貴陽見公於巡撫臺  
下出聞是於公之鄉人客有在坐者曰公其休服於無  
疆哉昔在士行牛眠協兆峻陟三公公茲實類於是守  
仁曰此非公意也公其慎厥終惟安親是圖以庶幾無  
憾焉耳已豈以徼福於躬利其嗣人也哉雖然仁人孝

子則天無弗比無弗祐匪自外得也親安而誠信竭心  
斯安矣心安則氣和和氣致祥其多受祉福以流衍於  
無盡固理也哉他日見於公以鄉人之言問焉公曰信  
以守仁之言正焉公曰嗚呼是吾之心也子知之其遂  
志之以訓於我子孫毋替我先公之德

賓陽堂記

戊辰

傳之堂東向曰賓陽取堯典寅賓出日之義志向也賓  
日義之職而傳冒焉傳職賓賓義以賓賓之寅而賓日

傳以賓日之寅而賓賓也不曰日乃陽之屬為日為元  
為善為吉為亨治其於人也為君子其義廣矣備矣內  
君子而外小人為泰曰賓自外而內之傳將以賓君子  
而內之也傳以賓君子而容有小人焉則如之何曰吾  
知以君子而賓之耳吾以君子而賓之也賓其甘為小  
人乎哉為賓日之歌日出而歌之賓至而歌之歌曰日  
出東方再拜稽首人曰予狂匪日之寅吾其怠荒東方  
日出稽首再拜人曰予億匪日之愛吾其荒怠其翳其

晴其日惟霽其昀其霧其日惟雨勿忤其昀倏焉以霧  
勿謂終翳或時其晴晴其光矣其光熙熙與爾偕作與  
爾偕宜條其霧矣或時以熙或時以熙孰知我悲

重修月潭寺建公館記

戊辰

隆興之南有巖曰月潭壁立千仞簷垂數百尺其上瀕  
洞玲瓏浮者若雲霞亘者若虹霓豁若樓殿門闕懸若  
鼓鐘編磬幢幢纓絡若搏風之鵬翮隼翔鵠螭虺之糾  
蟠猱猊之駭攫譎奇變幻不可具狀而其下澄潭邃谷



不測之洞環秘回伏喬林秀木垂蔭蔽虧鳴瀑清谿停  
洄引映天下之山萃於雲貴連亘萬里際天無極行旅  
之往來日攀緣下上於窮崖絕壑之間雖雅有泉石之  
癖者一入雲貴之途莫不因踣煩厭非復夙好而惟至  
於茲巖之下則又皆灑然開豁心洗目醒雖庸儔俗侶  
素不知有山水之遊者亦皆徘徊顧盼相與延戀而不  
忍去則茲巖之勝蓋不言可知矣巖界興隆偏橋之間  
各數十里行者至是皆憊頓饑悴宜有休息之所而巖

麓故有寺附巖之戍卒官吏與凡苗夷狎狎之種連屬而居者歲時令節皆於是焉釐祝寺漸蕪廢行禮無所憲副滇南朱君文瑞按部至是樂茲巖之勝憫行旅之艱而從士民之請也乃捐資庀材新其寺於巖之右以爲釐祝之所曰吾聞爲民者順其心而趨之善今苗夷之人知有尊君親上之禮而憾於弗伸也吾從而利道之不亦可乎則又因寺之故材與址架樓三楹以爲部使者休食之館曰吾聞爲政者因勢之所便而成之故

事適而民逸今旅無所舍而使者之出師行百里饑不得食勞不得息吾圖其可久而兩利之不亦可乎使遊僧正觀任其勞指揮狄遠度其工千戶某某相其役遠近之施捨勤助者欣然而集不兩月而工告畢自是饑者有所炊勞者有所休遊觀者有所舍釐祝者有所瞻依以為竭虔效誠之地而茲巖之奇若增而益勝也正觀將記其事於石適予過而請焉予惟君子之政不必專於法要在宜於人君子之教不必泥於古要在入於

善是舉也蓋得之矣況當法網嚴密之時衆方喘息憂  
危動虞牽觸而乃能從容於山水泉石之好行其心之  
所不愧者而無求免於俗焉斯其非見外之輕而中有  
定者能若是乎是誠不可以不志也矣寺始於戊卒周  
齋公成於遊僧德彬增治於指揮劉瑄常智李勝及其  
屬王威韓儉之徒至是凡三緝而公館之建則自今日  
始

玩易窩記

戊辰

陽明子之居夷也穴山麓之窩而讀易其間始其未得也仰而思焉俯而疑焉函六合入無微茫乎其無所指子乎其若株其或得之也沛兮其若決瞭兮其若徹菹淤出焉精華入焉若有相者而莫知其所以然其得而玩之也優然其休焉充然其喜焉油然其春生焉精粗一外內翕視險若夷而不知其夷之為阨也於是陽明子撫几而嘆曰嗟乎此古之君子所以甘囚奴忘拘幽而不知其老之將至也夫吾知所以終吾身矣名其窩

曰玩易而為之說曰夫易三才之道備焉古之君子居則觀其象而玩其辭動則觀其變而玩其占觀象玩辭三才之體立矣觀變玩占三才之用行矣體立故存而神用行故動而化神故知周萬物而無方化故範圍天地而無迹無方則象辭基焉無迹則變占生焉是故君子洗心而退藏于密齋戒以神明其德也蓋昔者夫子嘗韋編三絕焉嗚呼假我數十年以學易其亦可以無大過已夫

東林書院記

癸酉

東林書院者宋龜山楊先生講學之所也龜山沒其地  
化為僧區而其學亦遂淪入于佛老訓詁詞章者且四  
百年成化間今少司徒泉齋邵先生始以舉子復聚徒  
講誦于其間先生既仕而址復荒屬于邑之華氏華氏  
先生之門人也以先生之故仍讓其地為書院以昭先  
生之跡而復龜山之舊先生既已紀其廢興則以記屬  
之某當是時遼陽高君文芳方來令茲邑聞其事謂表

明賢人君子之迹以風勵士習此吾有司之責而顧以勤諸生則何事爰畢其所未備而亦遣人來請嗚呼物之廢興亦決有成數矣而亦存乎其人夫龜山沒使有若先生者相繼講明其間龜山之學邑之人將必有傳豈遂淪入于老佛詞章而莫之知求當時從龜山遊不無人矣使有如華氏者相繼修葺之縱其學未即明其間必有因迹以求道者則亦何至淪沒於四百年之久又使其時有司有若高君者以風勵士習為己任書院



將無因而圯又何至化為浮屠之居而蕩為草莽之野  
是三者皆宜書之以訓後若夫龜山之學得之程氏以  
上接孔孟下啟羅李晦菴其統緒相承斷無可疑而世  
猶議其晚流於佛此其趨向毫釐之不容於無辨先生  
必嘗講之精矣先生樂易謙虛德器溶然不見其喜怒  
人之悅而從之若百川之趨海論者以為有龜山之風  
非有得於其學宜弗能之然而世之宗先生者或以其  
文翰之工或以其學術之邃或以其政事之良先生之

心其殆未以是足也從先生游者其以予言而深求先生之心以先生之心而上求龜山之學庶乎書院之復不為虛矣書院在錫百瀆之上東望梅村二十里而遙周泰伯之所從逃也方華氏之讓地為院鄉之人與其同門之士爭相趨事若恥於後泰伯之遺風尚有存焉特世無若先生者以倡之耳是亦不可以無書

應天府重修儒學記

甲戌

應天京兆也其學為東南教本國初以為太學洪武辛

酉始改創焉再修於正德之己酉自是而後浸以敝圯  
正德壬申府尹張公宗厚始議新之未成而遷中丞以  
去白公輔之相繼為尹乃克易朽興頽大完其所未備  
而又自以俸餘增置石欄若干楹於櫺星門之外於是  
府丞趙公時憲亦協心贊畫故數十年之廢一旦修舉  
煥然改觀師模士氣亦皆鼓動興起廟學一新教授張  
雲龍等與合學之士二百有若干人撰序二公之績徵  
予文為記予既不獲辭則謂之曰多師多士若知二公

修學之為功矣亦知自修其學以成二公之功者乎夫  
立之師儒區其齋廟昭其儀物具其廩庖是有國者之  
立學也而非士之立學也緝其弊壞新其圯墁給其匱  
乏警其怠弛是有司者之修學也而非士之修學也士  
之學也以學為聖賢聖賢之學心學也道德以為之地  
忠信以為之基仁以為宅義以為路禮以為門廉恥以  
為垣牆六經以為戶牖四子以為階梯求之於心而無  
假於雕飾也其功不亦簡乎措之於行而無所不該也

其用不亦大乎三代之學皆此矣我國家雖以科目取士而立學之意亦豈能與三代異學之弗立有國者之缺也弗修焉有司者之責也立矣修矣而居其地者弗立弗修是師之咎士之恥也二公之修學既盡有司之責矣多師多士無亦相與自修其學以遠於咎恥者乎無亦擴乃地厚乃基安乃宅闢乃門戶固乃垣牆學成而用大之則以庇天下次之則以庇一省一郡小之則以庇其鄉閭家族庶亦無負於國家立學之意有司修

學之心哉若乃曠安宅舍正路圯基壞垣倚聖賢之門  
戶以為姦是學校之為萃淵藪也則是朝廷立之而為  
士者傾之有司修之而為士者毀之亦獨何心哉應天  
為首善之地豪傑俊偉先後相望其文采之炳蔚科甲  
之盛多乃其所素餘有不屑於言者故吾因新學之舉  
嘉多師多士忻然有維新之志而將進之以聖賢之學  
也於是乎言

重修六合縣儒學記

乙亥

六合之學敝久矣師生因仍以苟歲月有司者若無覩也故廢日甚正德甲戌縣尹安福萬廷珵氏既和輯其民始議拓而新之維時教諭長興徐丙氏來就圮舍日夜砥新厥士尹因謂曰子為我造士而講肄無所斯吾責何敢不力顧兵荒之餘民不可重困吾姑日積月累而徐圖焉其可乎民間相謂曰學諭方急訓吾子弟無寧居尹不忍困吾民而躬苦節省吾儕獨坐視非人也於是耆民李景榮首出百金以倡從而應者相繼不終

日聚金五百以告尹尹喜曰吾民尚義若此吾事不難辦矣然吾職務繁劇孰可使以鳩吾事者乎學諭曰尹為吾師生甚勞苦父老奮義捐金既費其財又盡其力而與一二僚請無妨教事以敦民間相謂曰尹不忍困吾民學諭方急訓吾子弟又不忍吾勞而身董之吾儕獨坐視非人也於是耆民王彰陳模首請任其役從而應者十夫以告尹尹喜曰吾民尚義若此吾事不難辦矣提學御史張君適至聞其事而嘉之衆益趨以勸十



月辛卯尹乃興事學諭經度規制以襄訓導某典史某  
察其勤惰稽其出納修大成殿修兩廡神厨庫前為戟門  
又前為櫺星門又前為泮宮坊皆以石殿後為明倫堂  
為東西齋又後為尊經閣明倫堂之左為三廨以宅三  
師前區三圃圃前為名宦祠又前為鄉賢祠又前為崇  
文倉明倫堂之右為致齋所又右為饌房又右為射圃  
而亭其圃之北曰觀德致齋之外為宰牲所又前為六  
號凡為屋百九十有七楹十二月丁巳工告畢役未逾

時也閭閻之民尚或未知其興作聞而來聚觀者相顧  
喑愕以為是何神速爾是何井井爾煥煥爾庠生某撰  
考其事來請予記予曰甚哉誠之易以感民也甚哉民  
之易以誠感也有司者賦民奉國鞭笞累繫不能得則  
反仇視今縣尹學諭一言而民應之若響使天下之為  
有司學職者咸若是天下其有不治乎此可以為天下  
之為有司學職者倡矣民之愛其財與力至爭刀錐斯  
舉手投足寧殆其身而不悔今六合之民感其上之一

言捐數十百金効力爭先恐後使天下之為民者咸若是天下其有不治乎此可以為天下之民倡矣民之蔽於欲而厚於利苟有以感之然且不憚費已之財勞已之力以赴上之所欲為士秀於民而志於道修其明德親民之學以應邦家之求固不費財勞力而可能也苟有以感之有不翕然而興者乎吾聞徐諭之教六合不數月而士習已為之一變使由此日遷於高明廣大以洗俗學之陋則夫興起聖賢之學以為天下士之倡者

將又不在於六合之士邪將又不在於六合之士邪

時雨堂記

丁丑

正德丁丑奉命平漳寇駐軍上杭旱甚禱於行臺雨日夜民以為未足迺四月戊午班師雨明日又雨又明日大雨乃出田登城南之樓以觀民大悅有司請名行臺之堂為時雨且曰民苦於盜久又重以旱將謂靡遺今始去兵革之後而大雨適降所謂王師若時雨今皆有焉請以志其實嗚呼民惟稼穡德惟雨惟天陰隲惟皇

克憲惟將士用命去其螾蟻惟乃有司實耨獲之庶克  
有秋乃予何德之有而敢叨其功然而樂民之樂亦不  
容於無紀也巡撫都御史王守仁書是日叅政陳策僉  
事胡璉至自班師

重修浙江貢院記

乙酉

古之選士者其才德行誼皆論定於平日而以時升之  
故其時有司之待士一惟忠信禮義而無有乎防嫌逆  
詐之心也士之應有司一惟廉恥退讓而無有乎奔競

僥倖之圖也迨世下衰科舉之法興而忠信廉恥之風  
薄上之人不能無疑於其下而防範日密下之人不能  
無疑於其上而鄙詐日生於是乎至有搜檢巡緝之事  
而待之不能以禮矣有糊名易書之制而信之不能以  
誠矣有志之士未嘗不嘆惜於古道而千數百年卒無  
以改殆亦風氣習染之所成學術教化之所積勢有不  
可得而復焉者也雖然古人之法不可得而復矣所以  
斟酌古人之意而默行之者不猶有可盡乎後世之法

不可得而改矣所以匡持後世之弊而善用之者不猶有可為乎有司之奉行其識下者昧古之道而益浚之以刻薄猥瑣之意其見高者鄙時之弊而遂行之以忽慢苟且之心是以陋者益陋而疏者愈疏則亦未可專委咎於法也若浙之諸君子之重修貢院斯其有足以起予者矣浙之貢院舊在城西嘗以隘遷於藩治之東北而苟簡尚仍其舊乃嘉靖乙酉復當大比監察御史潘君倣實來監臨乃與諸司之長佐慎慮其事而預圖之

慨規制之弗備弗飾相顧而言曰凡政之施孰有大於  
舉賢才者而可忽易之若是夫興居靡所而責以殫心  
厥事人情有所不能矣無亦休其啟處優其餽養使人  
樂事勸忠以各供其職庶亦盡心求士之誠乎慢令始  
禁罔使陷於非僻而後摧辱之其為狎侮士類亦甚矣  
無亦張其紀度明其視聽使人不戒而肅以全其廉恥  
庶亦待士以禮之意乎於是新選秀堂而軒於其前為  
三楹新至公堂而軒於其前為五楹庖湍器用無不備



具又拓明遠樓以爲三楹而上崇三簷下疏三道創石臺於四隅而各亭其上以爲眺望之所其諸防閑之道靡不恪修夫然後入而觀焉則森嚴洞達供事者莫敢有輕忽慢易之心而就試者自消其回邪非僻之念蓋不費財力而事修於旬月之間不大聲色而政令行肅觀向一新若諸君者誠可謂能求古人之意而默行之者矣能匡後世之弊而善用之者矣諸君之盡心其可見者如此至其妙運於心術之微而務竭於得爲之地

不可以盡見者固將無所不用其極可知也是舉也其  
必有才德行誼之士如三代之英者出以應諸君之求  
已乎工訖使來請記辭不克而遂為書之嗚呼天下之  
事所以弊於今而不可復於古者寧獨科舉為然乎誠  
使求古人之意而默行善用之皆如諸君今日之舉焉  
其於成天下之治也何有哉


濬河記

乙酉

越人以舟楫為輿馬濱河而廛者皆巨室也日規月築

水道淤隘畜洩既亡旱潦頻仍商旅日爭於途至有鬪而死者矣南子乃決沮障復舊防去豪商之壅削勢家之侵失利之徒胥怨交謗從而謠之曰南守瞿瞿實破我廬瞿瞿南守使我奔走人曰吾守其厲民歟何其謗者之多也陽明子曰遲之吾未聞以供道使民而或有怨之者也既而舟楫通利行旅歡呼絡繹是秋大旱江河龜拆越之人收穫輸載如常明年大水民居免於墊溺遠近稱忭又從而歌之曰相彼舟人矣昔揭以曳矣

今歌以楫矣旱之暘也微南侯兮吾其焦矣靈其彌月  
矣微南侯兮吾其魚鼈矣我輸我穫矣我遊我息矣長  
渠之活矣維南侯之流澤矣人曰信哉陽明子之言未  
聞以供道使民而或有怨之者也紀其事于石以詔來  
者



王文成全書卷二十三